

Na osnovu člana 17. stav (2) tačka 3. Zakona o unutrašnjim poslovima Kantona Sarajevo („Službene novine Kantona Sarajevo“, br. 22/00-Prečišćeni tekst, 15/02, 18/02 i 28/02) i čl. 50. i 133. tačka e) Zakona o policijskim službenicima Kantona Sarajevo („Službene novine Kantona Sarajevo“, br. 25/06 i 4/08), na prijedlog policijskog komesara, ministar unutrašnjih poslova Kantona Sarajevo utvrdio je prečišćeni tekst sačinjen od osnovnog teksta Pravilnika o načinu i rasporedu testiranja kandidata i sistemu bodovanja u procesu odabira policijskih službenika, broj 01-186/07 od 07.03.2007. godine, kao i izmjene i dopune broj 01-533/10 od 08.07.2010. godine i broj 01-162/11 od 11.02.2011. godine, u kojima su naznačeni i datumi stupanja na snagu navedenog Pravilnika i njegovih izmjena i dopuna, kao i odredba da se izmjene i dopune Pravilnika primjenjuju na javne konkurse čiji je postupak u toku u trenutku donošenja istih

## **P R A V I L N I K**

### **O NAČINU I RASPOREDU TESTIRANJA KANDIDATA I SISTEMU BODOVANJA U PROCESU ODABIRA POLICIJSKIH SLUŽBENIKA**

#### **- PREČIŠĆENI TEKST -**

##### **Član 1.**

###### **(Predmet)**

Ovim Pravilnikom utvrđuje se način testiranja, program testiranja, tijela koja vrše testiranje i uređuju druga pitanja koja su od značaja za provjeru stručne, radne i druge sposobnosti kandidata u procesu odabira za prijem policijskih službenika u Upravi policije Ministarstva unutrašnjih poslova Kantona Sarajevo (u daljnjem tekstu: policijski organ).

##### **Član 2.**

###### **(Primjena)**

- (1) Procesu testiranja podliježu svi kandidati koji su prijavljeni na javni oglas i ispunjavaju opće i posebne uvjete propisane Zakonom o policijskim službenicima Kantona Sarajevo (u daljnjem tekstu: Zakon), Pravilnikom o unutrašnjoj organizaciji Ministarstva unutrašnjih poslova Kantona Sarajevo i drugim podzakonskim aktima.
- (2) Odredbe ovog Pravilnika primjenjuju se i u postupku internog oglašavanja ako zakonom ili drugim propisom nije drugačije određeno.

##### **Član 3.**

###### **(Testiranje)**

- (1) Testiranje se vrši prema načinu pristupa policijskom organu, utvrđenom članom 42. Zakona.
- (2) Policijski službenik pristupa policijskom organu:
  - a) u činu policajca - kao prvi nivo pristupa, za kandidate s najmanje završenim IV stepenom školske spreme,
  - b) u činu mlađeg inspektora - kao drugi nivo pristupa, za kandidate s najmanje završenim VI stepenom školske spreme.

#### Član 4.

##### (Rok za testiranje)

- (1) Provjera stručne i druge sposobnosti se vrši u zavisnosti od nivoa pristupa u policijski organ, u skladu sa članom 42. Zakona.
- (2) Testiranje se obavlja u roku od 30 dana poslije isteka roka za prijavu. Samo kandidati koji su blagovremeno dostavili prijave i svu traženu dokumentaciju i koji su dokazali ispunjavanje općih i posebnih uvjeta imaju pravo pristupiti testiranju.

#### Član 5.

##### (Posebni uvjeti)

- (1) Kandidat za testiranje, pored općih uvjeta koji se odnose na prijem u radni odnos policijskih službenika propisanih članom 46. Zakona, mora ispunjavati slijedeće posebne uvjete:
  - a) da nije mlađi od 18 i stariji od 27 godina života za prvi nivo pristupa za kandidate sa najmanje završenim IV stepenom školske spreme i 35 godina života za drugi nivo pristupa za kandidate sa najmanje završenim VI stepenom školske spreme, izuzev u slučajevima propisanim članom 135. stav (3) Zakona,
  - b) da ima položen vozački ispit „B“ kategorije,
  - c) da ispunjava uvjet psihofizičke sposobnosti,
  - d) da ispunjava uvjet zdravstvene sposobnosti,
  - e) da položi test općeg znanja i pisani rad.
- (2) Kandidati se testiraju se po slijedećem redoslijedu:
  - a) test općeg znanja, uključujući pisani rad,
  - b) test fizičke sposobnosti,
  - c) drugi test koji policijski organ smatra potrebnim ili opravdanim.
- (3) Kandidat koji ne prođe jedan od testova iz stava (2) ovog člana isključuje se iz daljnjeg procesa odabira.

#### Član 6.

##### (Komisija za izbor)

- (1) Komisiju za izbor (u daljnjem tekstu: Komisija), rješenjem imenuje policijski komesar. Komisija je sastavljena od:
  - a) tri policijska službenika sa činom samostalnog inspektora i više, koje postavlja policijski komesar,
  - b) dva državna službenika zaposlena u Ministarstvu unutrašnjih poslova Kantona Sarajevo (u daljem tekstu: Ministarstvo), koji imaju najmanje službeno zvanje stručnog savjetnika, koje postavlja ministar.
- (2) Komisijom predsjedava policijski službenik sa najvišim činom.
- (3) Komisija odluke usvaja većinom glasova svih članova. O radu Komisije i odlučivanju vodi se zapisnik koji je sastavni dio spisa predmeta.

**Član 7.**  
**(Nadležnosti Komisije)**

Komisija je nadležna za:

- a) utvrđivanje sadržaja testova iz člana 5. stav (2) ovog Pravilnika, uz odobrenje policijskog komesara,
- b) provođenje postupka testiranja,
- c) utvrđivanje liste kandidata koji su ispunili uvjete za pristupanje testiranju,
- d) utvrđivanje konačnih rezultata za svakog kandidata, na osnovu broja bodova u svakom testu i ukupnog broja bodova za sve testove, te eliminaciju kandidata iz daljnjeg procesa testiranja, u skladu sa članom 5. stav (3) ovog Pravilnika,
- e) predlaganje kandidata koji imaju najveći ukupni broj bodova sa liste iz tačke c) ovog stava, radi upošljavanja u skladu sa brojem oglašanih upražnjenih radnih mjesta.

**Član 8.**

**(Priprema testova)**

- (1) Komisija priprema test općeg znanja i pisani rad, u saradnji sa organizacionim jedinicama Ministarstva i policijskog organa nadležnim za poslove edukacije.
- (2) Pitanja se koncipiraju tako da se na ista može odgovoriti jasno i nedvosmisleno, odabirom jednog od opcionalnih odgovora ili kratkim tekstualnim odgovorima na teoretska pitanja na koja se može odgovoriti definicijama i zakonskim podjelama.
- (3) Komisija je dužna prilikom pripreme testova voditi računa da težinu pitanja prilagodi nivou stručne spreme u skladu sa uvjetima za pristup u čin „policajac“, odnosno „mlađi inspektor“. Komisija određuje broj bodova za svaki tačan odgovor.

**Član 9.**

**(Sadržaj testova)**

- (1) Testovi općeg znanja sadrže pitanja iz slijedećih oblasti: ustavno pravo - ustavno uređenje Bosne i Hercegovine, Federacije Bosne i Hercegovine i Kantona Sarajevo, upravno pravo i organizacija uprave u Bosni i Hercegovini, Zakon o unutrašnjim poslovima Kantona Sarajevo, Zakon o policijskim službenicima Kantona Sarajevo, upravni spor, kancelarijsko poslovanje, radno pravo, krivično i prekršajno pravo, propisi iz oblasti sigurnosti saobraćaja na putevima, javnog reda i mira, propisi o ličnoj karti, ličnom imenu, prebivalištu, boravištu i državljanstvu građana.
- (2) Pisani rad iz bosanskog, srpskog ili hrvatskog jezika iz člana 13. Stav (5) tačka b) Pravilnika će se bodovati po slijedećim kriterijima: poznavanju pravopisa, izražavanju, urednosti, odgovoru na zadanu temu i kompoziciji teksta.
- (3) Vrijeme za izradu testa određuje Komisija, ovisno od broja i složenosti pitanja i isto iznosi od 60 do 120 minuta.

**Član 10.**

**(Tajnost sadržaja testa)**

- (1) Komisija, lica koja su učestvovala u pripremanju i obradi pitanja, kao i svi uposlenici Ministarstva koji dolaze u dodir sa testovima, dužni su čuvati tajnost sadržaja testova, kako sadržaj istih, pitanja i odgovori, ne bi bili učinjeni dostupnim kandidatima prije početka testiranja.
- (2) Predsjednik Komisije će, u cilju zaštite podataka iz stava (1) ovog člana, pripremljena pitanja, broj bodova za svako pitanje, tačne odgovore i cjelokupan ispitni materijal kovertirati i čuvati do početka testiranja.

- (3) Komisija može, u okviru iste kategorije kandidata, kandidati sa najmanje IV stepenom ili sa najmanje VI stepenom, sačiniti različita pitanja za dvije ili više različitih grupa, tako da dvije ili više grupa dobiju testove različitog sadržaja. Na naprijed navedeni način će se obavezno postupiti kada prijave podnese veći broj kandidata, tako da se svi ne mogu istovremeno testirati.

#### Član 11.

##### (Zdravstvena sposobnost)

Provjeru zdravstvene radne sposobnosti vrši Zavod za zdravstvenu zaštitu zaposlenika Ministarstva unutrašnjih poslova Kantona Sarajevo.

#### Član 12.

##### (Test fizičke sposobnosti)

- (1) Test fizičke sposobnosti obaviće instruktor za opšte fizičke pripreme Jedinice za podršku uz prisustvo predsjedavajućeg i članova Komisije.
- (2) Test fizičke sposobnosti provest će se prema standardima fizičke sposobnosti utvrđenim Kuperovim testom, koji je dat u prilogu ovog Pravilnika. Prilikom utvrđivanja broja bodova i eliminaturnog nivoa, vodiće se računa o spolu i starosnoj dobi svakog kandidata.
- (3) Broj bodova za svakog od kandidata utvrdiće se na način da se kandidati koji su stekli uvjet za pristupanje ovom testu, odnosno koji su dokazali ispunjavanje općih i posebnih uvjeta i koji nisu eliminisani na testu općeg znanja, razvrstaju u grupe prema spolu i starosnoj dobi i testiraju primjenom odgovarajućih normi Kuperovog testa, a zatim rangiraju prema ostvarenim rezultatima, odnosno ukupnom broju bodova ostvarenim u ovom testu.
- (4) Nakon eliminacije kandidata koji nisu zadovoljili eliminacioni prag, preostali kandidati se rangiraju prema ostvarenim rezultatima.

#### Član 13.

##### (Plan i program aktivnosti)

- (1) Komisija će u roku od 15 dana od dana isteka roka za podnošenje prijave na oglas, a u slučaju nesrazmjerno velikog broja kandidata u roku od 30 dana, utvrditi listu kandidata koji ispunjavaju opće i posebne uvjete i koji su blagovremeno dostavili potpunu dokumentaciju. Zapisnički će se konstatovati razlozi eliminacije kandidata zbog neblagovremene prijave, nepotpune dokumentacije i neispunjavanja pojedinih uvjeta.
- (2) Testiranje svih kandidata koji su stekli uvjete za pristupanje testovima obaviće se u roku od 15 dana od dana utvrđivanja liste kandidata koji su stekli pravo za pristupanje testiranju.
- (3) Ukoliko je pravo za pristupanje testiranju stekao nesrazmjerno veliki broj kandidata, testiranje se može istovremeno obaviti na više lokacija. Policijski komesar će u slučaju istovremenog testiranja kandidata na više lokacija pismeno odrediti potreban broj policijskih službenika sa zadatkom pružanja pomoći članovima Komisije u provođenju procesa testiranja.
- (4) Policijski komesar može za pripremu i ocjenu pisanog rada iz člana 5. stav 2. tačka a) ovog Pravilnika pismeno odrediti stručnu osobu.
- (5) Komisija će vršiti bodovanje testova na slijedeći način:
  - a) test općeg znanja 0 – 50 bodova,
  - b) pisani rad 0 – 10 bodova,
  - c) test fizičke sposobnosti 0 – 10 bodova,
  - d) drugi test koji policijski organ smatra potrebnim ili opravdanim (npr. intervju i sl.) 0 – 10 bodova.

- (6) Način i kriterije provođenja drugog testa iz tačke d) stava 5. ovog člana zapisnički utvrđuje Komisija.
- (7) Komisija će konačne rezultate utvrditi odmah, a najkasnije u roku od 7 dana od dana okončanja testiranja i iste odmah, a najkasnije u roku od dva dana po utvrđivanju, zajedno sa zapisnicima, izvještajem o radu i cjelokupnim spisom predmeta dostaviti policijskom komesaru.
- (8) Policijski organ objavljuje na svojoj oglasnoj ploči listu sa rezultatima postignutim na svakom testu, kao i konačne rezultate svih kandidata koji su pristupili testovima najkasnije u roku od 30 dana od dana posljednjeg testiranja. Na bodovnoj listi navode se i kandidati koji su uspješno završili testiranje i kandidati koji su predloženi za zapošljavanje.

#### Član 14.

##### (Eliminacioni prag)

- (1) Eliminacioni prag predstavlja onaj broj bodova koji je dovoljan za uspjeh kandidata na testu i sticanje prava za pristupanje narednom testu.
- (2) Eliminacioni prag za test općeg znanja predstavlja:
  - a) najmanje 60% od maksimalnog broja bodova koji se mogu ostvariti u ovoj vrsti testa, za kandidate koji pristupaju za čin policajca – kandidati sa završenim najmanje IV stepenom školske spreme,
  - b) najmanje 60% od maksimalnog broja bodova koji se mogu ostvariti u ovoj vrsti testa, za kandidate koji pristupaju za čin mlađeg inspektora - kandidati sa završenim najmanje VI stepenom stručne spreme.
- (3) Eliminacioni prag za test fizičkih sposobnosti predstavlja rezultat fizičkih testova ispod zadovoljavajućeg minimuma, utvrđen standardizovanim testom iz člana 12. stav (2) ovog Pravilnika.
- (4) Eliminacioni prag za drugi test koji policijski organ smatra potrebnim ili opravdanim utvrđuje Komisija, ukoliko odredi provođenje ove vrste testa. Komisija će, u svakom slučaju odrediti i provesti ovu vrstu testa kada dva ili više kandidata za isto radno mjesto ostvare jednak ukupni broj bodova i kada se primjenom drugih propisa, posebno propisa iz oblasti boračke i invalidske zaštite, ne može dati prednost jednom od tih kandidata.
- (5) Ukoliko kandidat ne ostvari eliminacioni prag na određenom testu, tada gubi pravo da pristupi narednom testu i eliminiše se iz daljeg izbornog procesa.
- (6) Komisija je dužna zapisnički konstatovati ostvarene rezultate svakog od kandidata, te u zapisniku navesti i obrazložiti razloge eliminacije za eliminisane kandidate. Na formu zapisnika se primjenjuju odgovarajuće odredbe Zakona o upravnom postupku kako bi isti imao dokaznu snagu u skladu sa navedenim zakonom.

#### Član 15.

##### (Održavanje reda prilikom testiranja)

- (1) Predsjedavajući i članovi Komisije dužni su se starati o redu prilikom provođenja testiranja. Prilikom testiranja nije dozvoljeno korištenje bilo kakvih drugih sredstava i materijala, izuzev onih koje Komisija odredi.
- (2) Komisija može isključiti iz daljeg postupka i kandidata koji se ne pridržava uputa o redu prilikom testiranja i svojim ponašanjem ometa postupak testiranja ili koji prilikom testiranja koristi nedozvoljena sredstava odnosno prepisuje ili zatraži odgovore od drugog kandidata ili koji učini dostupnim odgovore drugom kandidatu.

- (3) Predsjedavajući i članovi Komisije mogu pojasniti kandidatima sadržaj pojedinih pitanja iz testa, s time što ne smiju dati ili sugerisati tačan odgovor.

#### Član 16.

##### (Naknada)

Predsjedavajućem i članovima Komisije, administrativnom osoblju, te angažovanom instrukturu Jedinice za podršku, stručnoj osobi za pripremu i ocjenu pisanog rada i drugim policijskim službenicima zaduženim za pružanje pomoći Komisiji prilikom provođenje procesa testiranja pripada pravo na naknadu. O visini naknade odlučuje ministar na prijedlog policijskog komesara i prema dostavljenim izvještajima predsjedavajućeg Komisije.

#### Član 17.

##### (Utvrđivanje konačnih rezultata)

- (1) Ocjenjivanje kandidata provodi Komisija i stručna osoba iz člana 13. stav (4) ovog Pravilnika, na način propisan Zakonom i ovim Pravilnikom, tako da zasebno izvrši ocjenu i bodovanje svakog testa za koji je predviđeno bodovanje, a zatim ukupan broj bodova za svakog kandidata, prema kojem će sačiniti listu kandidata za oglašeno upražnjeno radno mjesto, tako da na početku liste navede lične podatke kandidata sa najvećim brojem bodova, uz naznaku bodova za pojedinačne testove, te lične podatke svakog slijedećeg kandidata, prema ostvarenom broju bodova, opadajućim slijedom.
- (2) Za kandidate koji su eliminisani u određenoj fazi testiranja, Komisija će navesti broj ostvarenih bodova u testu - testovima u kojima su ostvarili broj bodova veći ili jednak broju bodova utvrđenom kao eliminacioni prag, te broj bodova odnosno razloge za eliminaciju u testu u kojem nisu zadovoljili eliminacioni prag ili su eliminisani iz drugih razloga, predviđenih članom 15. ovog Pravilnika
- (3) Izvještaj sa cjelokupnim spisom predmeta Komisija dostavlja policijskom komesaru u roku iz člana 13. stav (7) ovog Pravilnika.

#### Član 18.

##### (Ravnopravnost spolova)

Gramatička terminologija u ovom Pravilniku podrazumijeva uključivanje oba spola.


#### Član 19.

##### (Stupanje na snagu)

Ovaj Pravilnik stupa na snagu danom donošenja.

Broj:01- 262/11

Datum: 10.03.2011.



**Prilog: Test fizičke sposobnosti (Kuperov test)**

**Test fizičkih sposobnosti za žene O.S.L. od 19 do 29 godina**

| Sklekovi | Trbušnjaci | Skok u dalj iz mjesta | Kuper test 12 minuta | Sprint 100m | Bodovi | Napomena |
|----------|------------|-----------------------|----------------------|-------------|--------|----------|
| 40       | 36         | 240                   | 2800                 | 15,0        | 10     |          |
| 38       | 34         | 230                   | 2600                 | 15,5        | 9      |          |
| 36       | 32         | 220                   | 2400                 | 16,0        | 8      |          |
| 34       | 30         | 210                   | 2200                 | 16,3        | 7      |          |
| 30       | 28         | 200                   | 2000                 | 16,6        | 6      |          |
| 25       | 26         | 190                   | 1800                 | 16,8        | 5      |          |
| 20       | 23         | 180                   | 1600                 | 17,0        | 4      |          |
| 17       | 20         | 170                   | 1400                 | 17,3        | 3      |          |
| 14       | 18         | 160                   | 1200                 | 17,6        | 2      |          |
| 10       | 15         | 150                   | 1000                 | 18,0        | 1      |          |

**Test fizičkih sposobnosti za žene O.S.L. od 30 do 39 godina**

| Sklekovi | Trbušnjaci | Skok u dalj iz mjesta | Kuper test 12 minuta | Sprint 100m | Bodovi | Napomena |
|----------|------------|-----------------------|----------------------|-------------|--------|----------|
| 38       | 33         | 230                   | 2700                 | 15,5        | 10     |          |
| 36       | 31         | 220                   | 2500                 | 16,0        | 9      |          |
| 34       | 28         | 210                   | 2300                 | 16,4        | 8      |          |
| 32       | 26         | 200                   | 2100                 | 16,8        | 7      |          |
| 28       | 24         | 190                   | 1900                 | 17,2        | 6      |          |
| 23       | 22         | 180                   | 1700                 | 17,8        | 5      |          |
| 18       | 20         | 170                   | 1500                 | 18,2        | 4      |          |
| 15       | 17         | 160                   | 1300                 | 18,6        | 3      |          |
| 12       | 15         | 150                   | 1100                 | 19,0        | 2      |          |
| 8        | 13         | 140                   | 990                  | 19,4        | 1      |          |

**Test fizičkih sposobnosti za žene O.S.L. od 40 do 49 godina**

| Sklekovi | Trbušnjaci | Skok u dalj iz mjesta | Kuper test 12 minuta | Sprint 100m | Bodovi | Napomena |
|----------|------------|-----------------------|----------------------|-------------|--------|----------|
| 34       | 31         | 210                   | 2500                 | 16,0        | 10     |          |
| 40       | 29         | 200                   | 2300                 | 16,4        | 9      |          |
| 28       | 26         | 190                   | 2100                 | 16,8        | 8      |          |
| 24       | 24         | 180                   | 1900                 | 17,2        | 7      |          |
| 20       | 22         | 170                   | 1700                 | 17,8        | 6      |          |
| 16       | 20         | 160                   | 1500                 | 18,4        | 5      |          |
| 12       | 18         | 150                   | 1300                 | 19,0        | 4      |          |
| 10       | 15         | 140                   | 1100                 | 19,6        | 3      |          |
| 8        | 13         | 130                   | 900                  | 20,0        | 2      |          |
| 6        | 11         | 120                   | 700                  | 20,4        | 1      |          |

Test fizičkih sposobnosti za **muškarce O.S.L. od 19 do 29 godina**

| Sklekovi | Trbušnjaci | Skok u dalj iz mjesta | Kuper test 12 minuta | Sprint 100m | Bodovi | Napomena |
|----------|------------|-----------------------|----------------------|-------------|--------|----------|
| 50       | 45         | 280                   | 3200                 | 12,0        | 10     |          |
| 48       | 43         | 275                   | 3000                 | 12,5        | 9      |          |
| 46       | 40         | 270                   | 2800                 | 13,0        | 8      |          |
| 44       | 38         | 260                   | 2600                 | 13,3        | 7      |          |
| 40       | 35         | 250                   | 2400                 | 13,6        | 6      |          |
| 35       | 32         | 240                   | 2200                 | 13,8        | 5      |          |
| 30       | 29         | 230                   | 2000                 | 14,0        | 4      |          |
| 27       | 25         | 220                   | 1800                 | 14,3        | 3      |          |
| 24       | 22         | 210                   | 1600                 | 14,6        | 2      |          |
| 20       | 20         | 200                   | 1400                 | 15,0        | 1      |          |

Test fizičkih sposobnosti za **muškarce O.S.L. od 30 do 39 godina**

| sklekovi | trbušnjaci | Skok u dalj iz mjesta | Kuper test 12 minuta | Sprint 100m | bodovi | napomena |
|----------|------------|-----------------------|----------------------|-------------|--------|----------|
| 48       | 42         | 270                   | 3100                 | 12,3        | 10     |          |
| 46       | 40         | 265                   | 2900                 | 12,7        | 9      |          |
| 44       | 37         | 250                   | 2700                 | 13,2        | 8      |          |
| 42       | 35         | 240                   | 2500                 | 13,5        | 7      |          |
| 38       | 32         | 230                   | 2300                 | 13,8        | 6      |          |
| 33       | 29         | 220                   | 2100                 | 14,2        | 5      |          |
| 28       | 26         | 210                   | 1900                 | 14,5        | 4      |          |
| 25       | 23         | 200                   | 1700                 | 14,8        | 3      |          |
| 22       | 21         | 190                   | 1500                 | 15,0        | 2      |          |
| 18       | 19         | 180                   | 1300                 | 15,3        | 1      |          |

Test fizičkih sposobnosti za **muškarce O.S.L. od 40 do 49 godina**

| sklekovi | trbušnjaci | Skok u dalj iz mjesta | Kuper test 12 minuta | Sprint 100m | bodovi | napomena |
|----------|------------|-----------------------|----------------------|-------------|--------|----------|
| 44       | 40         | 250                   | 2900                 | 12,8        | 10     |          |
| 40       | 38         | 240                   | 2700                 | 13,2        | 9      |          |
| 38       | 35         | 230                   | 2500                 | 13,6        | 8      |          |
| 34       | 33         | 220                   | 2300                 | 14,0        | 7      |          |
| 30       | 30         | 210                   | 2100                 | 14,4        | 6      |          |
| 26       | 27         | 200                   | 1900                 | 14,8        | 5      |          |
| 22       | 24         | 190                   | 1700                 | 15,2        | 4      |          |
| 20       | 21         | 180                   | 1500                 | 15,5        | 3      |          |
| 18       | 19         | 170                   | 1300                 | 15,8        | 2      |          |
| 15       | 17         | 160                   | 1100                 | 16,0        | 1      |          |



Test fizičkih sposobnosti za muškarce O.S.L. od 50 godina i više

| sklekovi | trbušnjaci | Skok u dalj iz mjesta | Kuper test 12 minuta | Sprint 100m | bodovi | napomena |
|----------|------------|-----------------------|----------------------|-------------|--------|----------|
| 36       | 35         | 220                   | 2700                 | 15,0        | 10     |          |
| 34       | 33         | 210                   | 2500                 | 15,4        | 9      |          |
| 30       | 30         | 200                   | 2300                 | 15,8        | 8      |          |
| 26       | 28         | 190                   | 2100                 | 16,2        | 7      |          |
| 20       | 25         | 180                   | 1900                 | 16,6        | 6      |          |
| 18       | 22         | 170                   | 1700                 | 17,0        | 5      |          |
| 14       | 19         | 160                   | 1500                 | 17,6        | 4      |          |
| 10       | 16         | 150                   | 1300                 | 18,0        | 3      |          |
| 8        | 14         | 140                   | 1100                 | 18,5        | 2      |          |
| 6        | 12         | 130                   | 900                  | 19,0        | 1      |          |